

Les deux Sermōs Fu-

NEBRES ES OBSEQVES
& enterrement du feu Roy Treschrestien Henri
deuxieme de ce nom, faicts & prononcez par
Messire Ierome de la Rouere, esleu Euesque de
Tholon : l'un à Nostre Dame de Paris, l'aulture à
Saint Denis en France.



A PARIS,
DE L'IMPRIMERIE DE ROBERT ESTIENNE.
M. D. LIX.
Par Commandement & Priuilege du Roy.

IOACH. BELLAIVS IN
LAVDEM HIERON. ROBOREI
THOLON. EPISCOPI.

58

*Glandiferas Quercus coluit ueneranda uetustas,
Cum Cereris nondum munera nota forent.
Fatidicas etiam Quercus responsa dedisse,
Testatur magno Sylua dicata Ioui.
Laurigeros nondum spectaras, Roma, triumphos,
Cingebatque tuos querna corona Duces.
Hac quoque Pontificum geminos bona Quercus honores
Seruat adhuc, multis conspicienda locis.
Hinc fluxit, docte Antistes, tibi nomen auitum,
Hoc titulo dignus, dignus honore uenis :
Dum Regi Henrico tali de fronde corollam
Taxis, ut hanc possit nulla abolere dies.
Et mihi dum laudesque tuas, laudesque tuorum
Persequor, & meritum te super astra ueho:
Non Myrtus, laurusque uirens, non Palladis arbor,
Sed tua sit capiti parta corona meo.
Interea quod pergis adi, fatisque secundis
Et faustum & felix nominis omen habe.*

A.ij.

Si Xenophon, bien que la verité
De son Cyrus quelque fois il ne die,
Iusques icy pour sa Cyropedie
Entre les Grecs ha telle auctorité:

Combien as-tu des François merité,
Docte Prelat, d'auoir rendu la vie
A ce bon Roy, qui plus grand que l'enuie
Viura par toy en la posterité?

Tel Xenophon son Cyrus nous depeint,
Qu'en vn tableau soubs vn argument feinct
Se monstre l'art de quelque excellent maistre:

Maïston HENRI tu peins bien autrement,
Le faisant voir en son accoustrement
Tel qu'il estoit, & tel qu'un Roy doit estre.

I. DV BELLAY.



LE PREMIER SERMON

EVNEBRE FAICT ET PRONONCE

es Obseques du feu Roy Treschrestien Henri
deuxieme de ce nom, en l'Eglise Nostre Dame
de Paris, le samedi douzieme iour d'Aoust, l'an
mil cinq cens cinquante neuf.



CONSIDERA *Israel pro his qui
mortui sunt super excelsa tua uulnerati:
inlyti Israel super mōtes tuos interfecti
sunt. quomodo ceciderūt fortes? 2. Reg. 1.*

Regarde & considere, ô Israel,
pour ceulx qui sont morts blesez
sur tes haults lieux: les preux, ô Israel, ont esté tuez
sur tes montaignes. comme sont cheus & abba-
rus les forts? Ainsi regrettoit le Royal Prophete
Dauid, la mort du vaillant Roy Saül, & de Iona-
thas son fils, lesquels furent tuez à la bataille cōtre
les Philistins, sur les montaignes de Gelboe. Luy
qui lors deuenoit Roy d'Israel, & estoit plein de
l'Esprit de Dieu, ne se peut cōtenir de deschirer ses
vestemēs à celle piteuse nouuelle, & griefuemēt la
plaindre, ensemble tout le peuple qui estoit avec-
ques luy, declarans par larmes, abstinence, & ieuf-

A.iiij.

nes, la douleur & le regret qu'ils portoyent de la mort de Saül, & la pitié que leur faisoit la maison d'Israel pour ceste violente mort. Et voulut le Roy Dauid estre apprinse de tous les enfans de Iuda (qui estoit sa maison) la deploration qu'il en feit, & leur enseigna, comme elle est contenue plus au long, & au lieu allegué, & au liure des Iustes, pour commemoration de si excellens personnages. Or ainsi n'eust il pleu à Dieu que nous semblablement en accoustremens de dueil, & conuoy funebre, avecques larmes, prieres, & oraisons, declarifions la griesue passion que nous soustenons pour vn si inopiné accident de la mort de feu de treschrestienne memoire le Roy Henri, deuxieme de ce nom, Roy (si oncques Prince fut, ou iamais sera) de tous bien aimé & désiré. Duquel deuant aujourdhuy rememorer la vie & la mort premier que proceder plus auant, nous inuoquerôs la grace du saint Esprit, par l'intercession de la benoïste vierge Marie, la saluât de la salutation Angelique, *Aue Maria*, &c.

Si tout le grand & spacieux Royaume de Frâce, comme il est d'vn mesme cuer, & d'vne volonté pour hōnorer ceste tresheureuse memoire, ainsi se pouuoit ranger dedans l'enclos de ce temple, pour tesmoigner sa douleur & son regret, il ne seroit, ce croy-ie, necessaire que moy ny autre entreprinst de faire le recit de ce qu'vne seule & commune voix d'iceluy Royaume publieroit de l'infinie & in-

comparable bonté, & de toutes les rares & singulieres vertus, dont il a senti si doux & gracieux fruit du viuant de son Seigneur & Prince. A laquelle voix s'accorderoit, non seulement celle des aultres Prouinces, qui en ont esté participantes: mais vniuersellement de toute la Chrestienté, qui ne pourroit entre aultres plusieurs bienfaicts ne recognoistre ce grād & dernier bien de paix, duquel elle peult maintenant iouir par son moyen. Vous ne vous esmerueillerez doncques, trehaults, trefexcellens, & trefillustres Princes, & vous Messieurs, si ceste mienne foible & tremblante voix pourra beaucoup mieux accompagner ce dueil vniuersel, qu'estre suffisante pour exprimer la vertu, la grandeur, magnanimité, clemence, & bonté de ce grand, vertueux, & vrayement debonnaire Prince, dōt l'ennuyeuse absence nous cause ce present dueil: absence dy-ie, pource que nous ne deuons estimer aultre chose auoir esté sa mort qu'un esloignement de nos yeulx, duquel si aucun mal s'ensuit, il demeure à nous, qui auons perdu sa gracieuse presence, non à luy qui est deuant celle du hault, & puissant, & glorieux throne du Seigneur Dieu. Mais si iamais possible a esté de se représenter deuant les yeulx vne vraye vertu & bonté viuement empraincte au cueur d'homme viuant, vous tous l'avez veüe & claiement cognue en la personne du feu Roy nostre Seigneur & Maistre: dont en faisant commemoration d'icelle, & la louant, nous

deuós estimer de louer & célébrer la propre vertu. Enquoy nous louerós aussi Dieu tout puissant, duquel toute vertu procede, ensemble ce Royaume ou elle est de long temps plantee & entretenue : & lequel a esté par le sainct vouloir de Dieu tousiours gouuerné & regi par tresvertueux , & valeureux Rois & Princes. Et n'est, ce croy-ie, de besoing que ie vous les rememore tous, vn Clouis, les Clotaires, vn Pepin ou Charlemagne, vn Philippe Auguste, vn sainct Louys, vn Philippe de Vallois, tât d'autres Rois de ce nom de Vallois (qui est le propre Gaullois) nō moins illustre & renommé qu'aucun des precedens, soit en proüesse aux armes, non seulement contre les ennemis du Royaume, mais de nostre foy Chrestienne, dont ils ont merité le nom de Rois Treschrestiens: soit en prudence, magnanimité, iustice & bonté, en toutes leurs actions. Je m'arresteray seulement à ce grand Roy François, pere de nostre Roy, d'autát que voulant vous dire tout ce qui fait au present propos, ie ne dois laisser le principal poinct, qui est de sçauoir de quel Roy ce Roy a esté fils. Et voulant reciter tout ce qui merite d'estre en tous siecles, & en toutes langues dict & rememoré de luy, ie crains qu'au lieu de parler du Fils, tout mon propos se consume au Pere: lequel reuiuât en son Fils par l'image representee de ses vertus, & par la consommation des belles & loüables euures par luy encommécées, pourra bien y auoir sa part: quād oyant parler du Fils, vous qui
n'avez

n'avez encores mis en oubli l'admirable sçauoir, la singuliere clemence, le hault & inuincible cueur de ce Roy François, par qui la Frâce a esté enrichie de tout ce qu'auoit de beau, non seulement le reste de la Chrestienté, mais icelle mesme saincte & venerable antiquité : vous, dy-ie, oyāt parler du Fils, recognoistrez les semēces dont tels fruiçts ont esté produicts en luy. Le costé maternel n'a esté moindre, soit pour accompagner vn tel Pere, ou pour nous donner vn tel Fils. La feu Royne Claude, fille du victorieux Roy Louys douzieme, pere du peuple, & d'Anne Duchesse de Bretagne, celle qui fut miroüier & exemple de toute vertu matronale, sera tousiours estimee entre les plus grandes & vertueuses Princesses, & plus heureuses meres, Mere de feu monseigneur le Daulphin, du feu Roy, de feu monseigneur d'Orleans, la feu Royne d'Escofse, feu madame Loyse, feu madame Charlotte, & de madame Marguerite, à present Duchesse de Saouye, en laquelle seule reluisent toutes les graces & vertus ioinctes au sçauoir Paternel, & sagesse, & pudicité maternelle. Donc nostre Roy extraict de ce sang, monstra incontinent (combien qu'il ne fust encores appelé à la succession du Royaume, estant le second Fils de France) qu'il estoit pourtāt né à plus haulte Seigneurie, que celle qui luy estoit aduenue pour lors: en sorte que nō sans grāde prouidēce de Dieu il fut reserué à ceste couronne, que depuis il a si dignement portee. Et si nous regar-

B.j.

dons bien tous les haults & excellens faicts, nous cognoistrons, que tout ainsi que par le feu Roy les bornes & limites de son Royaume ont esté estendues bien plus loing qu'il ne les auoit trouuees : aussi il a surmonté la bonté, non seulement de tous les Rois ses predecesseurs, mais bien de tous les autres, qui oncques furent estimez entre les meilleurs Princes. Dequoy la memoire nous demeurera perpetuellement engrauee au cueur, ou ne peult habiter vn si digne subiect ensemble avecques oubliance, ou ingratitude de si grãde & rare bonté. Ce qui a bien esté cause, Messseigneurs, que le respect de l'infinie obligation que ie sçay auoir à icelle bonté sienne, plus que n'a esté l'assurance de mes forces (que ie sçay combiẽ elles sont debiles) m'a faict entreprendre cest office, non d'Orateur, mais plustost de Deplorateur. Enquoy i'accompagne le Roy qui est à present, son sang, & comme i'ay dict du commencement, tout ce Royaume, & toute la Chrestienté. Et certainement nous pouuons bien redoubler nostre dueil avecques iceluy Roy Dauid, qui a commencé nostre propos, & assembler les plainctes que fait ce diuin Prophete sur Saül & Ionathas en la personne du feu Roy, auquel seul se peuuent à bon droict regretter les qualitez que tant humainement il regrette aux deux, les hault loüant entre autres choses pour auoir esté aimables, beaux & aduenãs en toute leur vie, plus vistes que les Aigles, & plus forts que les Lions. Car pre-

mieremēt d'auoir esté aimable, ce que desia nous auos dict de luy, & le dueil qui se voit peinēt en nos visages, & le nom qui luy durera à iamais, d'auoir esté l'Amour de tous estats, en rend assez suffisant tesmoignage. Mais les qualitez de l'Aigle & du Lion que iustemēt nous pouuós attribuer à nostre Roy avecques le Roy Dauid, m'ouuriront vn chāp si large, que ie n'auray q̄ peine de me cōtenir pour ne m'y laisser transporter. Dequoy nous parlerons apres, m'estant premieremēt despeché de quelques aultres poinēts, non moins dignes d'estre entendus. Et pour venir à la beauté & aduenance de sa personne, il n'y a hōme, quel qu'il fust en son Royaume, qui se prinst de plus belle taille que la sienne, de force, ou agilité plus grande, meilleure disposition à supporter tous accidens exterieurs, & tout labeur, duquel il estoit fort patiēt. Sa presence pleine de maiesté & grace le donnoit tousiours assez à cognoistre pour Roy, & ie ne sçay quel traitt d'œil si doux ensemble & graue, non seulemēt le faisoit aimer & respecter, mais aussi tesmoignoit la modestie, & l'amour dōt il cherissoit vn chacun. Vous auez veu, Messieurs, & ie m'asseure que l'aeuez noté souuētessois, que iamais il ne s'est monstré pour chose, dont vn aultre, non sans raison paraduēture, se fust aiseemēt troublé ou fasché, aucunemēt alteré en contenance ou parolle: patiēt & gracieux à escouter vn chacū. Que dy-ie escouter? voire iusques à supporter & excuser les imperfections de

ceux qui venoyent a luy parler : benign & facile
en ses responses: de maniere qu'un Pere de famille
ne vit point plus doucement avecques ses dome-
stiques en sa maison priuee, qu'il faisoit en ceste
grandeur avecques tous ses subiects, & tant d'es-
trangers. Il auoit la vertu tellement imprimee en
luy, que tout ainsi qu'il estoit prompt a la cognoi-
stre & aimer en autrui, aussi se rendoit il fort dif-
ficile a croire son contraire: comme si la bonté de
sa nature l'eust retiré de croire en autres, ce que
l'honnesteté ne permettoit y deuoir estre, & dont
sa conscience le iugeoit estre net. Je pourrois auoir
beaucoup de tesmoins de ceste sienne singuliere
bonté (Ce mot, Messieurs, parlant de ce Prince, ie
suis contrainct de souuent repeter, & à ce que ie voy
non avecques moindre contentement des escou-
rans, que l'effect en est & sera tousiours agreable)
mais ie dy auoir esté en luy ceste singuliere bonté,
qu'oyant aucunefois parler de quelque chose qui
fust à reprendre en aucun, ou il l'excusoit, ou bien
monstrois signe euident, que tel propos luy estoit
ennuyeux. Je diray plus, soit qu'il procedast d'icel-
le sienne propre bonté, qui ne desdaignoit person-
ne, soit de l'excellence de sa memoire, il n'auoit ia-
mais veu aucun, ou parlé vne fois à luy, qu'il n'en
retinst & le nom & l'effigie, si bien imprimée, qu'a
bien long temps de là il l'eust & recogneu, & nom-
mé par son propre nom. Lon fait cas de la me-
moire de Themistocles, pource qu'arriuant le ma-

tin en la publicque assemblée des Atheniens, il fa-
 lioit tous les Citoyens par leur nom: mais celle de
 nostre Roy a esté d'aultan plus grande, que son
 Royaume est plus grand qu'Athenes, & ses Serui-
 teurs, & ceulx avecques lesquels il auoit a traicter,
 en plus grand nombre que les Citadins Athe-
 niens. Car sachez, Messieurs, qu'il n'auoit homme
 à l'entour de sa personne, & de sa maison, de qui il
 ne sçeust le nom, & d'auantage de tous les Capi-
 taines & Lieutenans, & personages signales qui
 l'auoyent serui en toutes ses guerres, où bien qu'il
 eust veus au feu Roy son pere. Que diray-ie plus?
 il se delectoit de tous exercices honnestes, soit aux
 armes & cheuaux, soit à la chasse, & aultres ieux &
 passetemps: nō à ceulx qui sont pour amollir & affoi-
 blir la vertu de l'hōme, mais ceulx qui trauaillēt la
 personne, la diuertissent d'oïsiueté, & fortifient la
 nature, la rendant mieux disposée à soustenir les
 trauaulx & fatigues de la guerre. De ces exercices il
 n'y en a vn seul qu'il ne frequentaſt souuēt, & qu'il
 n'y monstraſt vne dexterité bien grande, & excel-
 lente: mais il aimoit singulierement la chasse, pour
 estre la plus noble, plus louée & prisee de tous les
 anciens & Rois, & Philosophes. Et laissant tous les
 aultres, ie me contenteray d'vn Alexandre le grād,
 & Xenophon: l'vn bien grand amateur, l'aultre &
 amateur & maistre de ceste profession, & de l'in-
 stitution Persienne, ou les ieunes hommes estoÿēt
 sur tout nourris à la chasse, pour les accoustumer

de bõne heure à vne plaifante imitatiõ de l'art militaire. Il tenoit de celle mefme institution, ou bien de celle des Parthes, ce qui appartient d'efre bien à cheual, partie principale de l'art militaire: en laquelle il eftoit fi adroiët & fi bien duiët, que fouuẽt-tesfois les plus excellẽs mefmes d'icelle profeflion, de quelque nation qu'ils fuſſent, trouuoient quelque choſe particuliere qu'ils pouuoient apprendre de luy. Or eftoit la richeſſe de ſa memoire ſi grãde, (pource que nous ſommes en ce propos) que tout ce qui auoit à luy ſeruir en l'vn & en l'autre de ces deux exercices, fuſt pour chiens, ou cheuaux, il le ſçauoit ſi bien par le menu (encores que le nombre n'en fuſt petit) & de ceulx qui en auoyent la charge, qu'eux mefmes ne les ſçauoyent pas mieux ou recognoiſtre, ou nommer. Et ſi en ces choſes plus aifees, pource que le plaifir mefmes nous fait retenir ce que nous y voyons, il faiſoit ſi grand' preuue de ſa memoire: ne penſez pas qu'elle ſe monſtraſt moins viue, & moins excellente en toute ſorte de ſçauoir, & toutes matieres ardues & difficiles. Deſia voyez vous noſtre Roy marchant par les mefmes pas du feu Roy François ſon pere. C'eſt à dire de la vertu & induſtrie, de la clemence & bonté, & diuinité de ceſt eſprit: duquel la longueur de l'aage, dõt le feu Roy François a ſurpaſſé celui du Roy ſon fils, a peu paradventure faire quelque plus grand monſtre: le ſons à la verité n'y euſt eſté moindre, & vne pareille maturité ſuruenue euſt peu deſ-

64
ployer en luy pareilles forces. Il fut doncques par iceluy Roy son pere acheminé des son enfance aux bonnes lettres, desquelles ce vertueux Prince auoit entrepris la protection & propagation, ostant le premier celle faulte & deprauee opinion, que la Noblesse ne deust estre instituee en toute humanité de lettres & de doctrine. Et encores que la grandeur & les delices, enquoy sont coustumierement nourris les grands Princes, ne leur permette d'y pouuoir vacquer longuement, si est-ce que nostre Roy feit tant en peu de temps par la bonté de son esprit, & l'heur de sa memoire, qu'estant encores fort ieune, & recitant publiquement aucunes choses de ses estudes, il tira en admiratiō de soy nostre sainct Pere le Pape Clemēt septieme, venu à Marseille, grandement accompagné, pour luy donner Madame sa niepce en mariage, qui depuis vint à la couronne. Ensemble avecques luy portant sur son chef vne sienne couronne, propre de vertu, pudicité & amour coniugale, telle qu'elle sera de tous estimee rare, & à iamais celebree en tous siecles à venir. Despeché de ses premieres estudes, ou il acquit assez bōne cognoissance de la langue Latine, il y adiousta encores deux aultres langues estrangeres, qui sont avecques la Françoisē en plus grand vsage par toute la Chrestienté. Ce sont l'Italienne & l'Espagnolle, desquelles il s'aidoit si bien, qu'il donnoit non moindre admiration que contentement à ceulx de ces pais là, quand il leur faisoit cest

honneur de leur respondre où parler en leur langue. En la sienne naturelle, si l'aduenoit qu'il fallust parler continuellement, comme il feist aux derniers Estats, qu'il tint peu auant la prinse de Calais (de quoy, Messieurs, plusieurs d'entre vous se peuuent bien souuenir) il se mōstroist si bien disant, & avecques si belles & graues sentences (encores que son parler fust court & militaire) qu'il seroit mal aisé d'y pouuoir rien adiouster. De tous les Ambassadeurs (affin que l'acheue de dire encores ce qui me souuient de sa diuine memoire) de tous les Princes & Seigneurs qui auoyent iamais passé par ce Royaume, il en auoit retenu les noms, leur negociatiō, & presques les façons de faire: les grandes maisons & alliances dedans & dehors le Royaume: les Pais & Prouinces, tant siennes qu'aultres: les histoires tant anciennes que modernes il auoit si bien retenues, que là ou il estoit, il n'auoit besoing de liures ny d'escriptures: en sorte que le plus souuēt quād il suruenoit doubte de quelque chose, il falloit auoir recours à la memoire du Roy. De toutes ces choses aduenoit qu'il auoit acquis vne singuliere & profonde prudence, quasi ayant tout le faict de son Royaume, & celuy des aultres pais deuāt ses yeulx comme peinct & tiré en vne table. L'hōneur qu'il a toute sa vie porté aux lettres, aux arts & sciences: le respect de la Iustice: la reuerence à nostre mere sainte Eglise: le soing & diligence à l'extirpation des heresies: l'amour enuers son Peuple, & particulierement

lièrement enuers sa Noblesse, sont toutes choses de soy grandes : & toutefois telles, que quelque demonstration qu'il en aist faicte, si a il tousiours faict paroistre vne bien plus grande volonté en luy de ie ne sçay quoy d'auantage, que ce qu'il faisoit. Ce qu'en partie peult auoir esté cause pour la difficulté des affaires qu'il a soustenues depuis son aduenement à la couronne : en partie pource qu'en bien faisant, si vouloit il tousiours monstrier qu'il estoit encores pour adiouster quelque chose à l'euvre qui luy sortoit des mains. Car combien que de son temps les lettres & les arts ayent fleuri, non moins que du regne du feu Roy son pere, pource qu'il entretenoit les commencemens qui par luy auoyent esté laissez, & fauorisoit ceulx qui estoient recommandables par quelque sçauoir : & qu'en aucunes choses son siecle aist passé l'heur de celuy du pere, cōme se peult veoir en la Musique & Poësie, qu'il aimoit & entendoit plus que mediocrement, lesquelles ont de son viuant atteinct à la perfection en ce Royaume : & non moins aussi l'Architecture & Peincture, estant ces deux cy accomplies, non seulement es edifices Royaux, mais quasi semées par toute la France : Si est ce que la grandeur de son esprit nous pouuoit promettre d'auoir à illustrer encores plusieurs aultres & sciences & arts. Et quant aux Mechaniques, & celles qui se tirent de l'artifice & inuention des plus excellēs ouuriers (lesquels il traictoit tresliberalement) elles ne furent iamais

C.j.

mieux entendues, ny en plus grande perfection. Vn chacun de vous sçait, Messieurs, cōbien il auoit a cueur la conseruation de la Iustice, à laquelle il a voulu quelquefois assister en personne, tant pour l'honorer, comme pour y tenir tousiours la main: ainsi qu'il estoit admonnesté par celle qu'il portoit com̃e Roy. Et touteſſois en ce faiēt icy ie ſuis encores contrainct de vous remettre en auant que vous ne luy auez veu parfaire tout ce que l'on deſcouuroit de ſon intention, & qu'il estoit pour executer, ſi le tēps l'eust permis. De meſmes ie puis dire au faiēt de la Religion, & extirpation des heresies, & de la reuerence enuers ſa ſaincte Eglise, enquoy il ſ'eſt monſtré tousiours ſi feruent & catholique, & vrayemēt Roy Treschreſtien, que lon pouuoit bien cognoiſtre qu'il n'auoit rien tant deuant les yeux, que l'honneur de Dieu, la conseruation & augmentation de ſa ſaincte Foy, & le repos & tranquillité de toute la Chreſtienté. Vous l'avez veu ſouuentefois en pluſieurs proceſſions & prieres publiques pour ce reſpect, & faire pluſieurs remonſtrances aux gēs de ſon Conſeil, de ſa Iuſtice, aux meſmes Prelats, à ce qu'ils tinſſent la main à leur debuoir en choſe ſi grande, ſi importante, & de laquelle dependoit le ſalut de tout ſon peuple: lequel il aimoit, non comme Prince ſon ſubieēt, mais comme pere ſon enfant. Et pleuſt ores à Dieu que ie ne deuſſe en ceſt aultre poinēt regretter l'vrgente neceſſité de ſes affaires, ou bien ceſte mort

precipitee, qui a empesché le cours & l'effect de la volonté qu'il auoit au bien & soulagement de son peuple. Enuers la Noblesse, il vous peult souuenir à tous, Messieurs, combien il a tousiours esté bening & recognoissant, de maniere que depuis qu'il scauoit quelcun estre Gentilhomme, & luy auoir faict seruice, il ne luy refusoit chose qui luy sceust demander, & prenoit plaisir de l'approcher de sa personne, & de l'honorer en tout ce qui luy estoit possible. L'entree de son Palais, de sa salle, & de sa chambre propre: que diray-ie plus? voire l'entree aux plus grands honneurs n'estoit refusee à ceulx qui portoyent ce tiltre: desquels le graue tesmoignage qu'il en rendoit quelque fois à part, estoit beaucoup plus à estimer que tout aultre bienfaict qu'il eust sceu faire. Et n'y a homme, si aucun y a, non encores recogneu, qui ne peust auoir ferme esperance de se debuoir ressentir de la benignité & liberalité de ce bon Prince. Dont n'est à tort que tous les Estats le pleurent, non comme Seigneur, Prince, ou Roy, mais comme pere tresdebonnaire. Et certainement si ce que nous auons iusques à present dict de luy, l'a rendu enuers vn chacun tant aimable & desirable, nous dirons que les aultres dignes & rares parties que nous n'auons point encores touchees, le doivent rendre par dessus tous esmerueillable. Car ie ne fay doubte, qu'en si grand nombre de ce que ie trouuois à dire de luy, il ne me soit iusques

à ceste heure eschapé quelque assez petite chose, petite dy-ie, en cōparaïson de luy, mesmes qui n'auoit rien qui se peult dire bas ou petit: mais bien de qui les petites choses seroyent reputees fort grandes en tout aultre . Or ne sçay-ie s'il se pourroit rien dire plus à propos de nostre Roy, que de le cōparer (cōme nous disîos tātost) avecques le Royal prophete Dauid, à l'Aigle, & au Lion: non seulement pource qu'ils tiennent chacun d'eulx le premier reng en son espece , comme le Roy tenoit le premier lieu entre les Rois, ou bien pour icelle mesmes agilité & force que disoit le Prophete : mais pour beaucoup d'autres raisons: dōt la premiere est , que cōme vray fils de l'Aigle, qui s'essaye à regarder encōtre le Soleil sans s'esbloüir : ainsi il n'eut la veüe de son esprit esblouye, ny offensee , pour tesmoigner d'estre vray fils du pere, quand de si bonne heure il luy fait faire preuue de sa vertu. Doncques il fut en ses plus ieunes ans en Espagne ostage pour la deliurance du feu Roy son pere , avecques feu Monseigneur le Daulphin , Prince duquel la grande esperāce presque aussi tost perdue que cōçue , nous en renouellera tousiours le dueil & le regret. Auquel faict il n'y a pas vne seule chose à considerer , mais plusieurs ensemble, & grandes . car ou soit la pieté enuers le pere , & l'asseurance de couraige en cest aage si tendre, ou soit l'honneste modestie , & le graue maintien, & digne du lieu d'ou ils estoÿt, chacune merite vne bien grāde & exquisite louāge.

Sur tout la pieté de ces deux Princes me semble beaucoup plus memorable que celle de Cleobis & Biton enuers leur mere, tant celebree par les histoires Grecques. Et veritablement oncques fils ne fut plus obeissant à pere, qu'il a esté iusques au dernier article au Roy son pere: auquel il assista tellement en sa derniere maladie, que le bon Prince apres luy auoir déclaré le cōtētemēt qu'il en auoit, luy donna sa benediction par trois fois, luy disant à la seconde fois, Mon fils faites vous encores vostre debuoir? Dieu le vous rēdra. Il ne porta moindre honneur à la feu Royne sa mere, & depuis à la feu Royne Leonor sa belle mere, à laquelle il rēdit tousiours fidelle obeissāce. Enuers ses enfās iamaïs pere ne fut si tendre de leur amour, & de Messieurs ses freres & seurs, bref nul de nature plus amiable enuers tout ce qu'il debuoit. Et maintenant fault que ie vous die quel il a esté enuers la Royne sa femme. Au retour d'Espaigne estant accordé entrē le Roy son pere, & le Pape Clement le mariage de luy & de la Royne, qu'il espousa à Marseille, cōme nous auōs touché cy dessus: il a depuis iusques au dernier iour vescu en tel amour & telle concorde avecques elle, que ce a esté vn exemple d'heureux & bien fortuné mariage. Auquel ayant passé bien longues annees sans auoir lignee, mais sans diminution d'amour, & en grande patience: a la fin nostre Seigneur, liberal remunerateur de ceste bonté reciproque entr'eulx deux, les en guerdōna

dignement, en les rendant contens de tant & si beaux & si vertueux enfans, desquels nous voyons le Roy qui est à present heureusemēt tenir le siege paternel: Messieurs ses trois freres attendre de grādes seigneuries, & Mesdames ses seurs aussi trois, l'une colloquee en la Royalle maison d'Espagne, l'autre espouse du tresvertueux & souuerain Duc de Lorraine, & la troizieme, qui ne peult qu'attendre vn mariage digne de sa grādeur & de son sang. Et si a plus vn fils & deux filles qui possèdent desia au ciel aueques le Pere Eternel, qui les a appelez de si bōne heure, vn meilleur heritage qu'ils n'eussent faict demeurans plus longuement en ceste miserable vie. O bien heureux mariage, ô sterilité bien recompēsee, & mieux j'ose dire que celle de Rachel: ô bien heureuse Mere, & heureuse lignee, par qui est aujourd'hui consolé & soustenu ce Royaume affligé. Sortāt de ces nopces (affin que nous voyōs desormais quel a esté nostre Roy aux armes) il ne passa gueres de temps que la guerre se recōmencea entre le feu Roy François & l'Empereur Charles cinquieme, lequel estoit venu aueques vne puissante armee entrer dedens le Royaume par le costé de la Prouence: là ou il monstra en la premiere charge qu'il eut du feu Roy au camp d'Auignon, combien lon se pouuoit desia promettre de luy. S'ensuyuit la retraicte de l'Empereur d'iceluy pays de Prouence, & d'autre part de bien grandes affaires en Piedmont, tellement que les places que

tenoit le Roy estoient en grand bransle . parquoy allant deuant le Roy en Piedmont, accompagné de M^{seigneur} le Connestable , lequel a tousiours depuis assisté à ce grand Roy, cōme vn second Nestor au Roy Agamemnon : il força sur l'armee de l'Empereur le passage des Monts , & r'asseura les places, en bonne deliberation de combattre ses ennemis. Et ne pensez, Messieurs, qu'en tous les lieux où il a depuis representé la personne du Roy son pere, au Camp de Landrecy, de Iallōs , de Boulongne, que iamais il aist eu plus expres commandement que cestuy seul de se garder de combattre : tant bien cognoissoit ce sage Pere sa hardiesse & vaillance, aidee de la ieunesse & desir de gloire & d'honneur. Et ce neantmoins ses conseils estoient bien trouuez fondez en bon aduis & bōne raison, de sorte que lon n'en debuoit esperer que bōne & heureuse issue, quand il eust voulu imiter le fils de Manlius Torquatus, & ne se rendre si estroictemēt lié aux commandemens du Pere, & aux loix de la discipline militaire. Arriué à la couronne, apres auoir appaisé fort sagemēt quelques troubles de son Royaume, & visité toute sa frontiere, le premier soing qu'il eut, ce fut de recouurer Boulongne, & les places que les Anglois auoyent occupees aux dernieres guerres . Enquoy il exploicta si bien, que non seulement il les reconquit vertueusement, mais aussi il vint à vne bonne paix & alliance avecques le feu Roy Edouard : pacifia sembla-

blement toute l'Eſcoſſe, remettant entre les mains des Eſcoſſois tout ce qui auoit eſté prins ſur eux par les Anglois leurs voiſins: entre leſquels coſtitua bornes & limites, & paix & amitié tât qu'il luy fut poſſible. Feit paſſer la Royne qui eſt à preſent en France, tant pour la tenir & honnorer aupres de luy, comme propre fille, qu'auiſſi en eſperance de faire le mariage, qui depuis eſt enſuyui d'elle & du Roy ſon fils: par leſquel la couronne de France eſt creüe & augmentée de celle d'Eſcoſſe, & pareillemēt illuſtree de toutes les vertus & graces, & dons de beauté & d'eſprit, que l'on ſcauroit deſirer en vne grand' Princeſſe. Il ſembloit que la Chreſtiété deuſt eſtre en repos pour longues annees, quand vn cas inopiné apporta au Roy occaſion du plus grand hōneur qu'eult ſçeu acquerir Prince du monde: & ce fut la conſeruatiō qu'il entreprint du Duc de Parme gendre du feu Empereur, & de la maiſon Farnefe, qui n'auoit pas touſiours eſté toute de ſon party: laquelle perſecutée des armes du Pape Iules troiſieme, & de l'Empereur meſmes, ne trouua plus ſeur ny plus certain appuy que de ſe iecter entre les bras du Roy, leſquel ſe diſpoſa de luy aſſiſter de toutes ſes forces: dont la guerre ſ'ouurit apres en tous endroiçts, & pour lors l'iſſue en fut telle qu'il maintint & conſerua la ville de Parme & la Mirandole. Parquoy noſtre ſainct Pere condeſcendit volontiers a prendre la paix & appointement, qui fut conclud entr'eulx, demeurāt
neant-

neantmoins la guerre sur pieds . S'enfuyuit apres la reduction d'une grand' partie des villes de Piedmont, & la restitution de la liberté des Siennes, lesquels aussi cōtre leur ancienne deuotion auoyēt esté cōtraincts de chercher secours en ce bon Roy, qui ne le denioit à personne, & qui embrassa leurs affaires comme les siennes propres. Et pour comprendre beaucoup en peu de parolles, il s'en acquitta de tresbonne foy, cōme il auoit faict auparauāt de Parme: n'ayant iamais voulu seulement de pensee y pretendre aucun particulier proufit . N'a-ce pas esté vne vistesse d'Aigle, & force de Lion, que d'auoir en si peu de temps porté ses armes victorieuses aux bords des Mers, & des principales riuieres d'Europe? Estāt les Princes d'Allemagne pour se ressentir de quelques torts qu'ils pretendoyent estre faicts à la liberté Germanique, ils ne l'osèrent entreprēdre sans la faueur & l'aide du Roy, lequel pour ne faillir au besoing & necessité de ses anciēs alliez & cōfederez, mena vne fort puissante armee iusques sur le bord du Rhein. Auquel voyage ayāt laissē Monseigneur le Duc de Guyse son Lieutenant general à Mets, il y soustint apres ce memorable siege contre toutes les forces de l'Empereur: auxquelles il résista heureusemēt, sauluant la ville, & tāt de Princes & Seigneurs qu'il auoit avecques luy, sans en perdre vn seul. Le passe la reconqueste de Hesdin, par le Roy de Nauarre, enuirō ce mesme temps, la prinse d'aultres villes en Piedmont,

la defenſe d'aultres, avecques tout plein de belles
factions & là, & en la Toſcane. Et encores qu'en
ce lieu le ſuccez des affaires ſe changeaſt apres, ſe
monſtrant plus fauorable pour l'ennemi, ou que
l'iniquité du temps, le ſite du pays, & la commodi-
té de ſe rafraſchir plus ſouuent, & de gens & de vi-
ures, luy rendiſſent toutes choſes plus aiſées qu'au
Roy: ſi eſt ce que nonobſtant la diſtance des lieux,
& la difficulté d'enuoyer ſecours, il n'abandonna
iamais la proteſtion de ceſte nobleſſe Siennesiſe,
qu'il auoit entreprinſe, & des villes qui eſtoyēt de-
meurees. Il laiſſe la prinſe de la Corſegue, tāt d'aul-
tres Camps ſoubs la ſage & vertueuſe conduicte
de Monſieur le Conneſtable, la prinſe de Ma-
riembourg, le voyage & retour des pays bas, la re-
ductiō preſques de tout Luxembourg, la prinſe de
tāt de fortes places, Luoy, Danuilliers, Montmedy,
Rodemar, Dinan, Bouuines, Bouillon, Lumes, ſ'e-
ſtant trouuē preſent en la plus grand' part d'icelles:
en ſorte que le tiltre qui eſt donné à Demetrius Roy
de Macedoine d'Expugnatureur de villes, ſembloit
iuſtement luy appartenir. Il ne puis pour le grand
nombre des grandes euures qu'il a faiſtes, les em-
braſſer toutes en peu d'heure, & en dire à ſuffiſance:
mais la freſche memoire qui en eſt encores, m'ex-
cuſera, & vous ſeruira en ce que ie pourrois obmet-
tre. Il viendra doncques à la trefue qui ſ'enſuyuit,
laquelle né tarda gueres d'eſtre rōpue, pour occaſiō
du ſecours que le Roy, cōme Treſchreſtien, eſtoit

obligé d'enuoyer à nostre saint Pere, luy qui portoit vne courōne qui tousiours auoit esté le recours de l'Eglise, & qui plus souuent auoit armé ses subiects pour la protectiō & tuitiō d'icelle, que n'ont fait beaucoup d'aultres Rois pour aultres querelles: il ne luy peut faillir de son aide, ne l'ayant auparauant sceu refuser aux Farneses, aux Siennes, aux Germain: enuoyāt en sa faueur sous la conduite de Mōseigneur de Guyse vne armee, laquelle ne bougea de là, tant que le requirent les affaires de nostre saint Pere, ou pour mieulx dire, iusques à ce qu'il l'en eut tiré dehors. Et lors les armes du Roy, qui auoyēt esté aux riuies du Tybre, de Larne, du Tronte, demeurerent en partie à celles du Pau, pour les affaires du Duc de Ferrare: & l'aulture partie de la Mer Adriatique & Tyrrhene, soubdainemēt par nouuel accidēt se trouua sous iceluy mesmes chef & cōducteur à la Mer Oceane: & furēt plâtees les enseignes de Frāce, deux cēs dix ans apres qu'elles n'y auoyent esté, sus la ville de Calais, & Guyennes, & tout le pays d'alentour. Ce qui ne fut de moindre allegiance à tout ce Royaume apres le defastre de l'esté precedent, que fut au peuple Romain celle belle faction de Marcellus, deuant la ville de Nola, à l'encontre d'Annibal: lequel depuis la iournee de Cānes n'auoit eu perte que ceste là, qui toutesfois luy en causa beaucoup d'aultres apres. Et ne scay si le peuple Romain, iadis exemple de toute vertu, magnaninité, & constance,

D.ij.

se monstra iamais si fort & si vaillant apres la def-
conuenue de Terentius Varro, & Æmilius Paulus
Cófuls en ce lieu de Cannes, que feit nostre Roy à
la nouuelle de la perte de ses chefs (qu'il aimoit sin-
gulieremēt) & de ses villes. Desployant à cest heure
là & la diligence d'Aigle à pourueoir promptemēt
a toutes choses, & armant son cueur, & r'asseurant
celuy de son peuple de la vigueur de Lion. La vi-
ctoire de Calais fut secondee de celle de Thionuil-
le, & celle premiere perte d'un aultre aux pays bas,
& comme meslees les vnes avecques les aultres,
ainsi que dit ce sage Philosophe, qu'il semble que
Dieu n'ayant voulu mesler ensemble le plaisir & la
douleur, il les a pour le moins attachez l'un à l'autre,
en sorte qu'ils s'entresuyuent ordinairement, &
succedent chacun a son tour. Et ou sont ceulx qui
n'ont iamais que la fortune en la bouche, & ne re-
cognoissent plustost du puissant Dieu des armees
(ainsi nommé aux Sainctes lettres) & les pertes, &
les victoires? Et certainement nostre Roy n'estoit
de ceulx là: mais bien tout ainsi qu'il recognoissoit
toutes les victoires de la main de Dieu, ainsi d'icel-
le mesme prenoit il les visitations qu'il plaisoit à
sa maiesté diuine de luy enuoyer: & luy suffisoit
(comme aussi doibt il a tout hómme prudent) quand
ou luy, ou ses chefs, entant que humainement se
pouuoit & se debuoit faire, auoyent pourueu aux
occurrences des affaires, en attendre telle issue, que
nostre Seigneur enuoyoit apres: ainsi qu'il feit es

deux occasions que nous auôs cy deuant touchees, ou lon n'eust sçeu ny au chef ny en l'armee aultre chose desirer, ie ne diray plus bonne ou mauuaïse fortune: mais qu'il eust pleu à Dieu que les choses fussent autrement reussies, que son infinie & profonde sapience n'auoit voulu. Et toutesfois nous n'appellerôs point de ses sainctes ordonnances, & en la mort de nostre Maistre prendrons exemple de luy mesmes, de nous arrester a icelle mesme volôté diuine, & la louerôs de la grace qu'elle a faiçte à nostre Roy, de pouuoir auant mourir mettre fin à tant de troubles & trauaulx de son Royaume: acheuant le cours de sa vie, lequel auoit tousiours esté plein de bonté & de vertu, par la plus saincte, plus vertueuse, & meilleure euure que Roy ne Prince eust sçeu faire, qui est de nous auoir laissé en bõne paix, vnion & concorde avecques tout le reste de la Chrestienté. Et à la verité qui le voudra bien prendre, il ne peult auoir occasion de si continuelle guerre entre les Chrestiens, ains la doibt on reputer comme vne sedition ciuile, laquelle n'est raisonnable qu'en vne ville bié pollicee elle dure trop longuement, & incontinent qu'elle est assopie, il ne s'en doibt plus ouir parler entre les Citoyens. Ainsi entre les Rois & Princes Chrestiens les dissensions se doibuët aiseement appaiser, & promptement oublier toutes offenses, rancunes & malueillances, si nous voulons que celuy, de la grace duquel nous auons incessamment besoing, nous par-

D.iiij.

donne & remette tant d'offenses que nous com-
mettons cōtre luy. Parquoy le Roy qui n'auoit ia-
mais refusé aucune ouuerture de paix, finalement
ayant esté avecques vne grande armee teste à teste
à celle du Roy des Espaignes, sans guerres s'endom-
mager l'vne & l'autre, comme si nostre Seigneur
eust voulu que l'honneur (quant au monde) y eust
esté gardé de tous les deux costez: fut aiseemēt dis-
posé d'accepter les partis qui furent proposez pour
les pacifier ensēble, eulx, leurs pays, subiects, alleez
& confederez, qui est aultant comme dire, toute la
Chrestienté: laquelle la grandeur de ces deux Rois
rirant apres soy, pouuoit ou tenir en trouble, ou
bien remettre en repos & trāquillité. Ce seul faict,
Messieurs, est tel, qu'ayant le Roy Henri en toutes
ses aultres euures laissé derriere soy la bōté de tous
les aultres Rois, en cestuy cy il a de beaucoup ad-
uancé la sienne mesmes: & peult dire n'auoir rien
obmis de ce qui peult atteindre au dernier poinct
& perfection de bonté: ayant pour le soulagemēt
de son peuple, pour le repos de sa Noblesse, la con-
seruation de sa Iustice, l'honneur & reuerence de
l'Eglise (qu'il n'estoit possible qu'elles ne se sentis-
sent aucunement de si longues guerres) bref pour
le bien vniuersel de la Chrestienté, franchement
remis, quād besoing en eust esté, quelque chose de
la rigueur de son droit. Au moyen dequoy j'ay
pensé avecques iuste occasion, qu'il ne tomberoit
telle ingratitude au peuple Chrestien, que de ne

ressentir sa part de la douleur que nous particuliere-
ment sentôs pout vne si griesue mort: mort, dy-ie,
qui la saisi en la quarâtevieme annee de son aage,
violête en ceste fleur, quâd ores elle ne l'eust esté de
coup si douloureux, en vne publique, & si vniuer-
selle ioye & allegresse: lesquelles il auoit tousiours
accoustumee de celebrer & hōnorer par quelques
actes cheualeux & dignes de Roy tant bien né
à toutes sortes d'armes, & retenant celle vraye &
naïfue vertu des anciens Rois, de n'y espargner sa
propre personne: Mort importune aduenue au
temps qu'il debuoit icy iouïr du fruit de la gloire,
& du merite de ses bienfaicts, & de ceste vnion, a-
uecques tous les Princes Chrestiens: & sur tous a-
uecques le puissant & Catholique Roy des Espai-
gnes, qu'il auoit acquis pour gendre & pour fils, &
lequel en ceste louable euvre de la paix auoit faict
concurrence avecques le bon zele du feu Roy son
beau pere. Car entre les aultres prosperitez de cest
heureux Prince, ceste cy n'est pas la derniere, d'a-
uoir esté comme pere de tât de Princes, & des pre-
miers de la Chrestienté, les contenant tous en son
alliance, & mesmes renouellant entre les Royal-
les couronnes de Frâce & d'Espagne, les ancien-
nes affinitez, lesquelles y ont tousiours estees: &
semblablement en l'endroiât de Monseigneur le
Duc de Sauoye, l'honorant du mariage de Mada-
me sa seur, dont nous auons desia faict mētion: le-
quel luy a tellement assisté en sa derniere mala-

die , que lon a peu assez cognoistre l'enuie qu'il eust bien eu de luy rendre quelque bon seruice en vne plus ioyeuse occasion . Voyons doncques ie vous prie quelle a esté ceste mort , & cognoistrons que nostre Seigneur, pour mieux le remunerer de ce bon zeile, l'a voulu faire iouir de la paix eternelle au ciel, puis qu'il l'auoit eue aux homes en terre. Car depuis que le bon Prince fut blessé de ce coup de lance en l'œil droict, qui fut le dernier iour de Iuing, il se trouua veritablement si estourdi pour ceste heure là, qu'il ne feit aultre chose que de se laisser medeciner & accoustrer sa playe. Le lendemain il demanda son confesseur, auquel il se confessa fort deuotement, & en grande contrition de cuer:& encores n'auoit on point descouuert qu'il eust fiebure:laquelle luy estat suruenue le quatrieme iour d'apres,& gaignant peu à peu l'apostume qui s'engendroit en sa ceruelle, lon cogneut qu'il n'auoit l'entendement si clair & si net qu'il souloit: fors qu'en vne chose seule, c'estoit d'escouter ententifvement,& respondre à propos, quand on luy parloit de Dieu,ou qu'on luy rememorait le merite de la passion de Iesus Christ,& l'esperance qu'il debuait auoir en icelle de la remission de ses pechez,& du salut de son ame. A quoy luy estoit assisté,oultre ses principaulx seruiteurs iour & nuict, de la Royne sa femme, du Roy & Royne qui sont à present, Mesdames ses filles,& Madame sa seur, & des Princes leur espoux presens, & de ceulx de son

son sang, & aultres: lesquels tous il prenoit plaisir de s'etir aupres de luy, & recogneut presques tousiours, & en demanda quelque fois aucun particulieremēt. Se cōfessa pour la deuxieme fois, & passa ainsi comme sommeillant, iusques au Dimanche neuueme de Iuillet, qu'il receut à la messe en grande humilité le precieux corps de nostre Seigneur: protesta qu'il mouroit en la vraye foy catholique, & en la creance & vnion de l'Eglise, desirant que tout son Royaume peust estre tesmoing de ceste sienne confession, suppliant le benoist Saulueur Iesus Christ de receuoir son esprit entre ses bras: & monstra signe assez euident qu'il eust cōtinué plus longuement ce propos, si possible luy eust esté, car desia il ne s'aidoit gueres plus de sa parole. Et apres auoir demandé le Roy son fils, luy dict, Mon fils ie vous recommande l'Eglise & mon Peuple: & comme il vouloit dire d'auantage, il ne luy fut possible: toutesfois bien tost apres luy estant demandé, s'il ne vouloit pas laisser quelque aultre commandement au Roy son fils, Qu'il persiste (respondit il) & demeure ferme en la foy, en laquelle ie meurs: & dict, qu'il luy donnoit sa benediction du meilleur cueur que iamais pere donna à fils, & l'embrassa fort amiablement. Lon pensoit qu'il deust passer à ceste heure là: mais il se reprint vn peu, & luy survint apres vne grosse sueur, qui luy dura presques iusques au ledemain lundi, qu'il demada & print fort reueremment la saincte onction: & ainsi garni

de toutes les marques de bon & vray Chrestien, rē-
dit l'esprit à Dieu.

O Royaume de France, & vous Chrestienté
maintenant pacifique & vnie par ce bon Roy, qui
vous a tant aimee, Vous en particulier peuple de
France, & Ministres de l'Eglise, qu'il a eus en prin-
cipale & singuliere recommandation iusques au
dernier soupir: n'aurez vous pas tousiours de ce-
ste tant Chrestienne & sainte mort de vostre Roy,
& regret, & memoire perpetuelle? ne m'accompai-
gnerez vous pas, ainsi que ie vous ay accōpaignez
en vostre dueil, en ces presentes prieres? lesquelles
il fault esperer qu'elles seront ouyes, se faisant pour
celuy qui n'a iamais esconduict priere qui luy aist
esté faicte: & que ses offenses luy seront pardōnees
à luy, qui ne refusa iamais grace qui luy aist esté de-
mandee. Nous vous prions doncques, ô puissant
Seigneur extraict de la Royale ligne de Dauid, ô
Saint & veritable, qui auez la clef de Dauid, qui
ouurez & personne ne ferme, fermez, & personne
ne peult ouurir: que vous vueillez remettre à ce
Roy, seruiteur vostre, les offenses que par fragilité
humaine il a cōmises enuers vous, & le colloquez
au sein d'Abraham, d'Isaac, & de Iacob, au lieu de
lumiere & de repos, & le couronnez d'une courō-
ne immortelle & incorruptible, le faisant iouir de
paix eternelle, là ou vous regnez auecques le Pere
& le saint Esprit, en tous les siecles des siecles.
Amen.



LE SECOND SERMON

FVNEBRE FAICT ET PRONONCE

es Obseques & enterrement du feu Roy Treschrestien Henri deuxieme de ce nom, en l'Eglise saint Denis en France, le Dimanche treizieme iour d'Aoust, l'an mil cinq cens cinquante neuf.



I VENT mortui tui, interfecti mei
resurgēt: expurgabimini, & laudate qui
habitis in puluere. Esa. 26.

Tes morts viurôt, les miens tuez
se releuerôt: esueillez vous, & donnez
louange, vous qui habitez en
la pouldre. Le Prophete Esaye apres auoir asseuré
le peuple de Dieu, qu'il abbattroit la mort pour iamais, & qu'il essuyeroit toutes les larmes de la face
d'un chacun, il dit que lon chantera un beau Cantique en la terre de Iuda, pour la paix, & pour le salut
obtenu du Seigneur Dieu, ainsi que l'on auoit de tout temps esperé en luy. Et entre aultres effects
de l'esperance accomplie, il nous asseure de la vie des morts, & de la resurrection des tuez: ne voulant
inferer aultre chose par ceste diuersité de langage, que nous monstrier en vne necessité, comme de mourir, vne asseurance vniuerselle de reuiure: qui

E.ij.

est l'esperance qu'ont eüe tous les saincts Patriarches & Prophetes, & qu'ils nous ont enseignée par tous leurs escripts. C'est celle tant indubitable & certaine esperance que le Patriarche Iob disoit auoir cachee & assise au milieu de son sein, & de son cueur. C'est la parolle que porta Ezechiel aux moceaux des ossemens, que Dieu luy auoit monstrez, esquels il feit venir l'esprit de vie. C'est la menace que fait Osee à la mort, qu'elle seroit réduite morte. C'est le reproche que luy fait saint Paul, luy demandant ou estoit sa victoire. Dont nous fault rendre graces à nostre Seigneur Iesus Christ, par qui nous auons eu ceste victoire contre la mort, estant aboli son decret, & nous asseurez de la resurrection, & de la vie. Doncques ie vous enherteray avecques le Prophete Esaye, puis qu'estes confirmez en ceste esperance, vous qui habitez & estes prosternez en la pouldre pour la mort du feu Roy Treschrestien, que vous leuez de ceste abiection de douleur & tristesse, & louiez nostre Seigneur Iesus Christ, luy qui est la vie mesmes & resurrection : & inuoquez avecques moy l'aide du pere Eternel, & la grace de l'Esprit Cōsolateur, affin que nous puissions à sa louange & son honneur dire quelque chose pour nostre cōsolatiō, par l'intercession de la Benoisite Vierge, luy presentant la salutatiō Angelique, *Aue Maria.*

Le deuot & humain debuoir de pieté vrayement Chrestienne, duquel ie vous voy acquieter iusques au dernier seruice que nous rendons au feu Roy.

Trefillustres, treshaults, & trefexcellens Princes,
 & vous Messieurs, est si notable & si vertueux,
 qu'il merite bié qu'apres la deploration q̄ nous fei-
 mes hier de sa mort, vous soyez aujourdhuy partici-
 pans de la cōsolation: laquelle sera fondee sur ceste
 vraye & certaine esperāce Chrestienne, dont nous
 auons tātost parlé, à sçauoir du gaing qu'aura faict
 ce bō Roy, d'vne meilleure & plus pardurable vie,
 en nous laissant vne fort bōne & gracieuse memo-
 ire de la siēne passēe, & de toutes ses vertus: ensem-
 ble la successiō d'un si bon regne sous le Treschre-
 stien Roy son fils, qui est à present.

Or comme à la verité toutes choses soyent fort
 grandes, & diuinemēt bien instituees en ceste heu-
 reuse Monarchie de Frāce, & de qui il semble que
 Dieu aist eue en toute saison vn particulier soulci, il
 ne se peult dire rien plus sainctement ne plus pru-
 demment ordonné, que nous ayons à rendre à nos
 Rois Treschrestiens le dernier debuoir de les accōpa-
 gner à la sepulture en ce saint lieu, & deuote Egli-
 se, dedice à l'honneur du glorieux martyr S. Denis
 Arcopagite, Apostre de Frāce: là ou le mesme per-
 sonnage, duquel la Frāce a appris la foy de Iesus
 Christ, & la regeneratiō par luy au faict baptisme, *Ioan. 3.*
 nous peult tousiours aussi admōnester de la resurre-
 ctiō à vie, laq̄lle il nous a enseignee en iceluy nostre *Ioan. 11.*
 Redēpteur & benoist Saulueur. Je pourrois dire en
 oultre, que luy, cōme fort prochain du tēps auquel
 se fait nostre redemption, auant toutesfoi qu'estre.

appelé à la voye de salut & foy Chrestienne, fut ad-
uertí par son grand sçauoir d'un si grand change-
mēt au cours de nature, qu'il se delibera de vouloir
cognoistre celuy qui auoit telle puissance extraor-
dinaire sur icelle nature. Et apres, estant deuenu di-
sciple de ce vaisseau d'electio l'Apostre saint Paul,
nous a laissé entre aultres choses par escript la for-
me laquelle s'obseruoit pour lors en la commemo-
ration & priere pour les morts: ainsi que garde en-
cores auiourdhuy l'Eglise Chrestienne, presque de
semblable façon & cerimonie, avecques bien peu
de difference. D'auātage, que les anciens Rois l'ont
eu en telle veneration, qu'ils ont voulu ou tous, ou
la plus grand' partie d'eulx, estre inhumez en ce
saint Temple: tant pource que nous auons desia
dict, comme aussi affin qu'en vn lieu fussent amas-
sez les monuments, & comme dressé vn Mausolee
du sãg Royal de Frãce. A celle fin que les Rois, qui
viendroyent apres ceulx qui ont desia satisfait à
ceste presente vie, peussent estre excitez à prendre
exemple, & les subiects inuitez à entrer en espoir
des vertus & tous louables actes des Rois leurs pre-
decesseurs, tant renommez & estimez: desquels se
voyent icy les tombeaux, les enseignes & les me-
moires de leurs principaux faictz. De ce aduiant il
qu'en quelque endroiēt que ie tourne les yeulx, ie
n'apperçoy aulcune chose, qui ne me remplisse de
bonne esperãce, ou pour mieulx dire, n'accomplis-
se celle que nous debuons tous auoir. car soit que ie

contēple nostre Seigneur & Saulueur Iesus Christ
 en cest arbre de la croix, ie y voy ce dur decret de la
 mort, que nous auons dict au commencement, at-
 taché & rompu : ie voy en son trophée la victoire *1. Cor. 15.*
 sur la mort: ie voy en sa resurrection de luy, qui a e-
 sté les Primices de ceulx qui ont dormi, la viuifica- *1. Cor. 15.*
 tion des aultres apres chacun en son ordre: Soit *col. 1. apo. 1.*
 aussi que ie regarde le saint tóbeau de ce glorieux
 Apostre, il me reduit à la memoire que son Sei-
 gneur & Maistre, de qui il a annocé & soustenu la
 parolle, iusques à en souffrir bien cruelle mort, en
 assœurace de la foy & repromission de vie, à laquel-
 le il est desia passé: ce bon Maistre, dy-ie, veritable *Heb. 11.*
 & fidele en ses promesses, n'oublie ceulx qui me- *ioan. 5.*
 rent en luy, & en presente les cōquestes faictes par *ioan. 3,*
 sa croix à son pere Eternel. En apres me mettant à *7, 8.*
 considerer les monuments de tāt de Rois, lesquels *3. Reg. 2.*
 (comme disoit de foy le Roy Dauid qu'il s'en alloit
 faire) sont entrez en la voye de la terre vniuerselle,
 c'est à dire, au chemin que prennēt toutes les cho-
 ses prinſes & creées de terre: ie voy vne biē heu-
 reuse & glorieuse succession de Rois tant vertueux &
 vaillants, que ie prens certaine assurance de pou-
 uoir tousiours dire, Que des bōs les bons prouien-
 nent, & des forts s'engendrent les forts. Doncques
 estant les choses telles comme nous auons dictes,
 & que nous dirōs, avecques la grace de Dieu, plus
 particulieremēt: ie veulx esperer que ce seront cau-
 ses assez suffisantes pour prendre consolation & al-

legeance de toute tristesse & douleur. Je n'ignore point que la plus dure chose à porter qui soit, est ceste cy que nous appelons Mort, tellement que le plus souuēt la seule pensée & apprehension de mort apporte à plusieurs vn estonnement & bien grāde fālcherie : pour ce qu'estant excitee par les obiects qui se presentēt aux sentimēs corporels, il ne peult qu'il ne semble bien estrange quand lon considere qu'il fault de ce qu'on est, venir quasi à non estre. Dont vous verrez tous ceulx la en porter plus grief tourment, lesquels n'ayās que les yeulx charnels ne voyent point plus loing, que s'estend leur veüe corporelle: laquelle si elle n'est aidee de celle de l'entēdement, illuminé des vifs rayōs de la foy Chrestienne, elle ne se peult bonnement appeler veüe, mais plustost aueuglement. Aussi tous les plus sages, & les Chresttiēs, apres auoir, ou en eulx, ou en aultruy consideré ce dernier poinct si terrible, ils pliēt aucunemēt a ceste force que leur fait la nature de s'es-mouuoir & troubler vn peu, attēdu qu'il n'est rien tant humain, que de se ressentir des accidens humains : mais ils se reprennent apres, & se rassurēt, appelans à leur aide, la raison " par grace de Dieu illuminee", qui leur remonstre comme il est neceffaire d'acheuer ceste vie qui veult en acquerir vne plus perdurable: ainsi qu'une semēce ne peult produire vne herbe ou plante à vie, si elle n'est premierement morte en la terre. Nous auons en ce faict, comme en tous les principaux qui concernent no-
 stre

stre salut, l'exemple de nostre Saulueur & Redem-
 pteur Iesus Christ, lequel estant venu en ce monde
 pour accomplir toutes les cōditions de nostre hu- *philip. 1.*
 manité, qu'il auoit prinse pour la rendre apres plus *heb. 4.*
 parfaicte, s'esmeut & fremit en son Esprit, & ius-
 ques à plorer pour la mort du Lazare qu'il aimoit: *ioan 11.*
 & lors qu'il estoit prochain de la sienne, il se trouua *Luc. 22.*
 en bien fort grande agonie. Or cōsiderons ie vous
 supplie ce que feit nostre Seigneur en la mort du
 Lazare, apres qu'il eut satisfaiēt à ce debuoir d'hu-
 manité: & bien dy-ie humanité, car les Iuifs qui
 estoient presents dirēt, Voyez comme il l'aimoit,
 entendāt du Lazare son ami (ainsi l'auoit luy mes-
 mes nommé auparauant) à l'heure il va dire à ses
 paaues tristes & dolentes sœurs, qu'elles n'eussent
 point de craincte, & qu'elles verroyent la gloire de
 Dieu, moyennāt qu'elles eussent vraye foy. Et ceste
 foy fut si grāde, qu'elle leur feit voir la resurreccion
 de mort à vie de leur frere tant desiré. Ainsi mes
 amis, nous ne pouuons pas nous contenir de nous
 troubler & contrister de ceste mort: mais il nous y
 fault remedier par vne pareille foy de ces deux
 sainctes sœurs du Lazare. Passons à la mort de no-
 stre Saulueur, & voyons qu'estant en icelle agonie
 il se meit en longue priere & oraison, & lors l'Ange *Luc. 22.*
 vint du ciel pour le consoler, & il se print à dire que
 la volonteé du Pere fust faicte, & non la sienne.
 O singuliere obeissance, ô amour & charité incom-
 parable, ne nous monstrez vous pas que nous ne

Deut. 34.

debuons resister à la volonté, ny empescher la gloire de vostre Pere? Au Deuteronome dernier chapitre, parlant de la mort de Moysé, ce grand seruiteur de Dieu, & tel qu'il n'a depuis esté vn aultre pareil, (comme dit l'Escripture) qui aist esté receu à parler si familièrement avecques le Seigneur: il ne s'en red point d'aultre raison, sinon que *mortuus est iubente Domino*, il est mort par le commandement & volonté du Seigneur. Laquelle volonté si nous debuons suyure, comment debuons nous ne nous cōtenter des euures par lesquelles se manifeste sa gloire? Et certainement si nous sommes disciples de nostre Seigneur, nous ne l'empescherons: ains ferōs comme le bon Apostre saint Thomas, lequel ayāt ouy dire à sō Maistre, que la mort du Lazare estoit pour la gloire de Dieu: He, mes amis (dict il) aux aultres Apostres, allōs nous en aussi mourir avecques luy: comme voulant dire plus expressement, Puis qu'il est question de la gloire du Seigneur, ne perdons point ceste occasion, & ores qu'il nous couste la vie, allons y ioyeusement, affin que Dieu y soit glorifié. Or estans tous ces saints esmerueillables, comme ils sont, cestuy cy n'est il pas plus grād que tous les aultres, & passant toute admiratiō, de trouuer vie en la mort, renouation presque en vn anichilement, vn plus seur & plus bel edifice en vne destruction? Et pour laisser la mort du Lazare, ou lon pourroit dire que la gloire de Dieu sy manifesta par sa resurrection particuliere, qui fut visible,

Ioan. 11.

combien qu'il soit mort depuis, ayant beſoing en-
 cores d'une aultre reſurrection (car autrement noſ- Colloſ. 1.
 tre Seigneur ne ſeroit dict le premier né des morts) apoc. 1.
 ceſte gloire ſe manifeſte en toute aultre mort, &
 ſpecialement Dieu eſt clarifié (comme parle l'E-
 ſcripture) en la mort de tous les Saints & Martyrs.
 Saint Iean parlant au dernier chapitre de la mort
 de Saint Pierre, il dit, *Hoc autem dixit, ſignificans quā* Ioan. 2.
morte clarificaturus eſſet Deum. Et oſtez les tourmens
 qu'ont ſupporté les Saints Apoſtres & Martyrs a-
 uecques ſi grande conſtance : le pas de la mort en
 quelque perſonne que ce ſoit eſt une grande demō-
 ſtratiō de la gloire de Dieu, & eſſect de ſon infinie
 puiſſance: puiſſance, dy-ie, nō de deſfaire une cho-
 ſe qu'il a faicte, ce que l'homme a faict du commē-
 cement de ſoy meſmes, acquerant pour ſa deſo-
 beiffance le loyer de peché, qui eſt la mort : mais Rom. 5.
 puiſſance de deſtruire ceſte mort, laquelle il fault
 premierement qu'elle ſuruiēne, pour ſe veoir apres
 abiſmee en ceſte victoire de la croix de noſtre Saul- 1. Cor. 15.
 ueur Ieſus Chriſt, par qui nous ſuccede en lieu de
 mort une vie eternelle. *Sicut enim Pater ſuſcitāt mor-* Ioan. 5.
tuos & uiuificat: ſic & Filius quos uult uiuificat. Neque e-
nim Pater iudicat quēquam: ſed omne iudiciū dedit Filio,
ut omnes honorificent Filium, ſicut honorificant Patrem.
Qui nō honorificat Filium, non honorificat Patrem, qui mi-
ſit illum. Tout ainſi que le Pere reſuſcite les morts &
 les viuifie: ainſi le Fils viuifie ceux qu'il veut. Car le
 Pere ne iuge aulcun: mais il a donné au Fils tout le

iugement, affin que tous honnorēt le Fils, comme ils honnoient le Pere. Qui n'honore le Fils, n'honore le Pere qui l'a enuoyé.

1. Petr. 5. Que dirons nous doncques, mes amis, ne nous humilierōs nous point soubz la puissante main du Seigneur? *Dominus enim mortificat & uiuificat, deducit ad inferos, & reducit.* Car c'est le Seigneur qui mortifie, & viuifie, qui conduit aux enfers, & en ramene. Or voyons combien d'occasion nous auons de nous soubmettre à ceste sienne volonté pour le bien qui nous en vient: *Amen amen dico uobis, quia uenit hora, & nunc est, quando mortui audient uocem Filij Dei: & qui audierint, uiuent: Sicut enim Pater habet uitam in semetipso: sic & dedit Filio uitam habere in semetipso.* Le vous dy veritablement que l'heure vient, & est à present, en laquelle les morts orront la voix du Fils de Dieu: & ceulx qui l'auront ouye, viuront. Car comme le Pere ha vie en soy-mesmes, aussi a il donné aux Fils auoir vie en soy-mesmes. Doncques si nous oyons la voix du Fils de Dieu, nous aurons la vie eternelle. Et qu'est-ce aultre chose ouir sa voix, que de respondre à l'assurance qu'il nous donne de la vie? Et quand nous oyons qu'il nous dit, *Ego sum resurrectio & uita: qui credit in me, etiam si mortuus fuerit, uiuet: & omnis qui uiuit, & credit in me, non morietur in eternum. Credis hoc?* Le suis la resurrection & la vie: celuy qui croit en moy, encores qu'il soit mort, il uiura: & tout homme qui vit & croit en moy, il
1. Reg. 2.
Ioan. 5.
Ioan. 11.

ne mourra iamais. Croyez vous cela? Il nous fault
lors respondre à ceste voix ainsi que luy respon-
dit Marthe, *Vtique Domine*, ouy Seigneur nous le Ioan. 11.
croyons. Et puis que nous croyons qu'il aist à nous
en aduenir de ceste sorte, nous auons esperance
de vie, & ceste esperance est si bien fondee, que
iamais elle n'apporte confusion. *Si enim cum inimi-* Rom. 5.

ci essemus, reconciliati sumus Deo per mortem Filij eius:
multo magis reconciliati, salui erimus in uita ipsius. Si
nous estans ennemis auons esté reconciliez à Dieu
par la mort de son Fils: par plus forte raison, nous
estans reconciliez, serons sauluez en sa vie. Qui
est l'esperance que ie dy que nous auons: *scē enim* Rom. 8.

salui facti sumus. Spes autem quæ uidetur, non est spes:
nam quod uidet quis, quid sperat? si autem quod non ui-
demus, speramus: per patientiam expectamus. Nous
sommes sauluez par l'esperance. Or l'esperance
n'est pas des choses que lon voit: car qui est celuy
qui espere ce qu'il voit? Mais si nous esperons ce
que nous ne voyons, c'est que nous attendons
par patience. Escoutez, mes amis, ce que l'Apo-
stre saint Paul dit à ceulx lesquels il a confirmez
en ceste esperance par la parolle de Dieu, qu'il leur
auoit prêchee. *Nolumus autem uos ignorare, fratres,* 1. Theß. 4.
de dormientibus, ut non contristemini, sicut & ceteri
qui spem non habent. si enim credimus quod Iesus mor-
tuus est, & resurrexit: ita & Deus eos qui dormierunt
per Iesum, adducet cum eo. Nous ne voulons pas que
vous ignorez la condition de ceulx qui dorment,

affin que vous n'ayez à vous en contrister, comme
 les aultres lesquels n'ont point d'esperance: car si
 nous croyons que Iesus est mort, & resuscité, ain-
 si Dieu amenera avecques luy ceulx qui par Iesus
 Christ dorment. Enquoy sont bien dignes de con-
 sideration les mots dont à vsé par grand iugement
 le sainct Apostre, lequel parlant de nostre trespas,
 ne l'a appelé Mort, ains Sommeil: pour addoucir
 l'aigreur de la mort par l'esperance de la vie, tout
 ainsi que celuy qui dort espere de se resueiller: n'e-
 stant gueres differente la condition de l'homme
 dormant, à celuy qui est mort. De semblable lan-
 gage vsa nostre Seigneur Iesus Christ quand il re-
 sulcita le Lazare, dont nous auons desia parlé, *La-
 zarus amicus noster dormit*: ou il se declara apres aper-
 tement à ses disciples, qui l'auoyent prins pour le
 sommeil naturel, non pour le sommeil de la mort.
 Semblablement en la resuscitation de la fille de
 l'Archisynagogue, *Non est mortua puella, sed dormit*:
 non pour aultre chose, sinon pour inferer le resueil
 qui s'en debuioit ensuyure à la gloire & louange de
 Dieu. Ceste esperance de ce resueil nous doibt bien
 chasser toute melancholie, considerant non seule-
 ment en aultruy, mais en nous mesmes l'admirable
 effect qui en vient: lequel effect se peult prendre de
 la sorte comme nous disions, que d'une semence
 cachee & corrompue en terre, se produit vne her-
 be, ou vne plante viuante: & fault que le grain de
 froment tombant en terre y meure premierement,

Ioan. 11.

Matth. 9.

pour produire apres beaucoup de fruiſt, comme il
 eſt dict en ſainct Iean douzieme: ou bien ainſi que *Iohn. 12.*
 d'vne ſtatue de cuyure deſia endomagee & gaſtee
 par le temps, on en renouuelle & fait vne bien plus
 belle, apres l'auoir briſee & miſe en la fonte, ou elle
 eſtoit deuenue preſque à neât, au moins quāt pour
 auoir aulcune forme. Laquelle ſimilitude n'eſt gue
 res differente de celle du potier, que met Ieremie *Ierem. 18.*
 au dixhuiſtieme chapitre, lequel de la meſme terre
 d'vn vaiſſeau rompu en auoit faiſt vn aultre neuf;
 ainſi qu'il luy auoit pleu deuāt ſes yeulx: & de meſ-
 mes qu'vne maiſon ruineuſe, dont vous venez à
 chaffer les habitans pour l'abbatre apres à terre, &
 y reedifier de nouueau, & baſtir vn bel edifice &
 plus ſomptueux, auquel vous logez plus hōnora-
 blement les hoſtes que vous en auiez deboutez. Ce
 qui eſt bien conforme à ce que diſoit noſtre Sei- *Iohn. 3.*
 gneur, parlant du temple de ſon corps, qu'il auoit
 puiſſance de le deſtruire & le reedifier dedans trois
 iours. Voila mes amis, comme vous vous debuez
 cōturber biē peu de la mort, ny meſme de la pour-
 riture, laquelle il ſemble qu'elle vous apporte vne
 certaine horreur: puis que par icelle eſt veriſié ce
 grand miracle dont nous auons parlé, qui eſt de
 trouuer vie en la mort, renouation en vn annea-
 tiſſement, vn plus beau & plus ſeur edifice en vne
 deſtruction. Et ſe trouue ce miracle encores plus
 admirable en la mort, qu'en toutes les choſes alle-
 guees, leſquelles ne laiſſent d'eſtre ſubiectes vne

aultre fois à pareils accidens: mais le corps de l'hō-
me, apres qu'il est vne fois, de caducque & mortel
qu'il estoit, renouuelé & refaiët, cōme il doibt estre,
il n'est plus subiect à alteration quelconque . Et
certainement ie ne croy point qu'il y aist personne
de vous, lequel en voyant vn cōrps mort, n'estime
voir quelque aultre chose, que ce qui se presente
deuant ses yeulx: car il n'y a moindre difference en-
tre ceulx qui en iugent ainsi qu'il appartient, & les
aultres qui ne pensent point plus auant, comme il
y a entre vn homme scauant, & vn ignorant. Des-
quels celuy qui est ignorant, en voyant des lettres
escriptes, ne pense que voir les lettres seules, là ou le
scauāt est aduertī de s'imaginer quelque bien grād
sentiment caché dessous ces lettres. Tous voyent
auecques les mesmes yeulx les accidens des choses
humaines: mais non pas auecques le mesme entē-
dement. Parquoy, quand nous auons veu ceste fi-
gure du feu Roy nostre maistre, ne la contemplōs
maintenant telle qu'elle est, mais imaginons la tel-
le que nous esperōs qu'elle doibue estre: & par ainsi
tesmoignons de n'estre point du nombre de ceulx
qui n'ont point d'esperance, & qui pleurent telle-
ment les choses perdues, comme si elles estoient du
tout desesperées. Et de ce il aduiendra, que toutes
les aultres plainctes que nous scaurions mettre en
auant, seront plus tost pour le regret de chose qui
nous cōcerne particulieremēt, que pour aulcū mal
qui soit aduenū à la personne du feu Roy: auquel
par ce

par ce que nous auons deduiet cy deuât, nous deb-
uons eſperer qu'il ne luy pourra eſtremal. Et main-
tenant ie ne veulx compter tous les maulx & incô-
ueniens qui ſ'eſcheuent par la mort (deſquels il eſt
à ceſte heure exēpt) de quoy ſont pleins les eſcripts,
non ſeulement des Philoſophes, mais de tous les
Poètes Gentils. Au moyen de quoy, ſi nous conti-
nuons à le plaindre pour ſon regard, nous môſtre-
rons de ne l'aimer tant que nous debuôs, & qui eſt
meſmes noſtre propre intētion de faire, & de mô-
ſtrer. Ie dy plus, que ſi la pitié de luy nous faiſoit de-
ſirer, que pour le moins il euſt veſcu plus longue-
ment (car qui eſt celuy, lequel ayât eu cognoiſſan-
ce de ſa vertu & de ſa bonté, n'eũt deſiré qu'il en
euſt peu vſer plus longuement, & nous iouir de ſa
tant humaine preſence?) puis que nous aduouons
vn ſi grand bien luy eſtre préparé, ainſi que noſtre
Seigneur garde à ceulx qu'il aime: nous ne debuôs
murmurer ny contreuenir, en quelque temps qu'il
luy en aiſt voulu donner la iouiſſance. Nous auôs
iuſques icy parlé comme Chreſtiens, auxquels en-
cores qu'il ſoit permis, comme nous auons mon-
ſtré, de plorer les morts par l'exemple de noſtre
Saulueur Ieſus Chriſt, & par la plaincte que feirēt Ioa. 11.
les diſciples, & gens craignans Dieu, de la mort de Act. 8.
ſainct Eſtienne protomartyr: touteſſois ſi fault il
que nous monſtriôs n'eſtre deſpourueus & delaiſ-
ſez, comme les Payens & Gentils, de ceſte eſperāce
que nous auons dict: laquelle non ſeulement nous

a enrichis par dessus eulx d'un si grād biē que nous aurōs, mais encores de la cōsolation que nous peult dōner la seule pensee, & l'attēte de l'auoir. Et voyōs qu'en ce passage, qui est extreme de tous, & ou se font trauailliez tous les Philosophes Gētils d'y employer la lumiere de nature, qu'ils ont peu auoir, sans trouuer la cōsolation qu'ils cherchoyent: nous l'auons par la passion & resurrection de nostre Seigneur telle qu'elle peult nous oster de toute passiō, & nous mener à vie, & rēplir de gloire, "mesmemēt

Rom. 8.

si nous sommes les cooperateurs'. *Existimo enim quod non sunt condignæ passionēs huius temporis, ad futuram gloriam, quæ reuelabitur in nobis.* l'estime, ce dit l'Apostre sainct Paul, que les passiōs & les tourmens que lon souffre en ce tēps, & en ceste vie, ne sont point dignes pour contrepoiser la gloire qui se reuelera en nous. Qui sont choses q̄ le mesme Apostre sainct

1. Cor. 2.

Paul assure en aultre endroiēt n'auoir prescheesen la haulteur de parolles, ou de sapiēce, ou en persuation de la science humaine: mais les auoir tesmoigneesen la croix de nostre Seigneur Iesus Christ, en infirmité & craincte, en la declaratiō de l'Esprit, & de la vertu: pour nous enseigner, non la sapiēce de ce mōde, mais celle qui est cachée en ce grād mystere, predestinee deuāt les siecles pour nostre gloire:

Esai 64.

1. Cor. 2.

ainsi qu'il est escript en Esaye, & allegué au mesme lieu par sainct Paul, *Quod oculus non uidit, nec auris audiuit, nec in cor hominis ascēdit, quæ præparauit Deus iis qui diligūt illum.* Qu'il n'y a œil qui aist veu, ny aureil-

le qui aïst ouy, ny est môté au cueur ny en la pensee d'hôme du mode, ce que Dieu a preparé à ceulx qui l'aimēt. Et Esaye auoit dict à ceulx qui l'attendent, c'est à dire ceulx qui esperent en luy, ceulx qui ont foy en ses promesses, & en attendent par patiēce les effects: sçachant comme il est fidele & veritable en toutes ses parolles. Parquoy nous admōnestre trefbien l'Apostre sainct Pierre, *Itaque & hi qui patiūtur* 1. Petr. 4.
secundū uoluntatem Dei, fidei Creatori cōmendent animas suas in benefactis. Ceulx qui souffrēt selon la volonte de Dieu (ayant vn peu deuāt parlé de la mort & du iugemēt) qu'ils recommandēt par bienfaicts leurs ames au fidele Createur: comme s'il vouloit dire, au Createur qui est veritable pour accōplir fidele-
Ioan. 3.
apoc. 3.
mēt sa parole. C'est la raison pourquoy ie vous disois du commencement, que l'assurance qu'auoit monstree en icelle sienne parole que nous a preschee le glorieux Apostre de France S. Denis, nous admōnestoit d'auoir pareillemēt ceste bonne esperāce de l'heur immortel & gloire eternelle de nostre Roy. Et maintenāt, si pour ceulx qui sont plus infirmes, nous vouliōs parler plus humainement: considerōs vn peu ie vous prie que tout ce que lon peult faire & trauailler en ce monde pour acquerir honneur & gloire & reputation, soit en paix, soit à la guerre, & pour gaigner les cueurs & volōtez des hommes, tant ses subiects, qu'estrāgers, & pour disposer de grand nombre de seigneuries, de grande estendue de pays, & de grands biēs: le feu Roy s'en

G.ij.

estoit tellement acquiſté, & le fruit auoit ſi bien
reſpondu à ſon labeur: que ie ne ſçay ſi de long tēps
vn aultre Roy, qui aiſt porté la meſmes couronne
qu'il portoit, ſe pourroit eſgaler ou cōparer à luy.
Parquoy il iouit à preſent de l'hōneur & de la gloi-
re qu'ont meritē avecques l'aide de Dieu ſes haults
& magnanimes faiſts: deſquels la commemora-
tion en eſt d'aultant plus agreable à tout le mōde,
qu'ils ont eſté tous executez, ainſi que nous eſti-
mons, en treſſaincte, treſiuſte & louable intētion:
& dōt il n'y a preſque nation en l'Europe, qui n'en
aiſt ſenti prompt & liberal ſecours, & vn aide ſi ſeur
& ſi fidelle, que iamais hōme affligé n'a eu recōurs
à luy, qu'il n'aiſt eſté amiablement recueilli & re-
leue: ne iamais homme a mis ſa fiance en luy, qu'il
ne luy aiſt gardé la foy ſi entiere, que pour toutes
les commoditez qui ſe ſoyent iamais offerres, il n'a
voulu penſer d'en faire ſon proufit particulier: onc-
ques perſonne ne ſ'adreſſa à ce bon Roy, qui ne
retournast de deuant ſa face ioyeux & content, &
de parolles, & d'effects: ce qu'il faiſoit ordinaire-
ment, iuſques à ſ'eſſayer de ſe tromper ſoy meſmes
de ce qu'il pouuoit, pour ne reſuſer choſe qui luy
fuſt demandee. Et d'aduantage (ceci ne ſe dira ia-
mais ſans vne rare & ſinguliere louange de luy, ny
ſera ouy ſans vn extreme plaiſir) c'eſt, Meſſieurs,
qu'il ne fut oncques en ſa vie autheur, de ſa volōté,
ou de ſon ſceu, d'aucun mal à aucun homme vi-
uant. Et nonobſtant les guerres, eſquelles il a preſ-

que continuellement esté, cōme Prince belliqueux & magnanime qu'il estoit, & que durāt icelles son peuple s'en soit diuersement senti : si est ce que son intention & bōté tant cogneue par tout le Royaume, le rend si desirable & si plainct par tout, & aux lieux mesmes ou il n'auoit iamais esté veu ne cogneu de presence, qu'a bon droict il est appelé l'Amour de tous estats: tiltre nō moins propre & bien deu à ce bon Prince, que fut iadis celuy du Prince Titus Vespasianus; entre les Empereurs Romains surnommé l'Amour & les delices du genre humain. Mais pourquoy nous arrestons nous à vn seul tiltre, là ou la quantité de ses faicts tant vertueux, tant bons & vtiles aux hommes, meriteroit les surnoms des dieux fabuleux des Gentils, par lesquels ils recognoissoyent d'eulx toutes les commoditez de la vie humaine? Vous doncques, ô Roy bien heureux, apres auoir haultement esleué vōstre chef à l'encontre de la grand mer Oceane, vous estre heureusement estendu enuers la Mediterraine, touchant tout à l'enuiron aux grādes Alpes & Fleues memorables du Royaume ancien d'Austrasie, eslargissant vos liberalles & secquables mains par tout, & repoulsant toute iniure & oppressiō de vos subiects & de vos amis: vous auez couronné vos royales euures d'vne bien heureuse pacification vniuerselle de la Chrestieté: & en pareille saison que nostre Seigneur Iesus Christ nous apporta la paix celestielle en terre, vous en estes allé

iouir au Royaume eternal, nous delaissant ceste
tēporelle. Laquelle vous ne nous laissez seulement,
mais aussi la renommée de tant d'illustres eures, &
souuenance de tant de memorables bienfaicts, dōt
nous vous apprestons vn monumēt en nos cueurs
à iamais. Ce que nous asseurons vous aurez pour
aggreable, vous qui ne desaggreastes iamais riē qui
soit: & que receurez benignemēt ce que nous vous
pouuōs presenter, & que ie scay exprimer, vous qui
n'avez iamais denié chose qu'avez peu ou sceu dō-
ner. Vous nous laissez, ô Roy accompli de bonté,
pour nostre consolation vn tel souuenir, que nous
sommes obligez de le rendre plus hōnorable pour
vous, que lamentable pour nous. Et si nous auons
aultrefois loüé le Seigneur Dieu tout puissant, &
Pere tresdebonnaire, de vous auoir enuoyé de ses
benedictions, en vous donnāt si numereuse & bel-
le lignee: nous l'en remercions à ceste heure de tout
nostre cuer, & prenons de la main de son infinie
bonté ceste aultre consolation: laquelle nous est
d'aultant plus grande, qu'elle est cōmune auecques
vous, de voir porter vostre sceptre, & vostre cou-
rōne, & tenir vostre main de Iustice au Roy vostre
fils: duquel nous sçauons ce que nous debuōs attē-
dre, puis qu'il est vostre, & que l'avez esleué & insti-
tué aupres de vous. Helas, Messieurs, il m'est aduis
qu'encores resonnent dedans mes oreilles les pa-
rolles pleines de douceur & de bonté, que le feu
Roy porta à tous ses estats: vous disant auoir bien

voulu que le Roy son fils y fust present pour estre
 tesmoing de sa volonté: & de laquelle il le char-
 geoit de l'accôplir, s'il aduenoit qu'il pleust à Dieu
 de l'appeler à soy: à sçauoir, d'vser de tout le meil-
 leur traictement & soulagement qu'il pourroit en-
 uers son Royaume, incontînêt qu'il auroit le moyē
 d'estre sorti de ses affaires. Ne fut-ce pas, Mes-
 sieurs, vn grand tesmoignage de la bonne volonté
 du feu Roy, & grande assurance de celle du Roy
 son fils: Lequel il vous peult souuenir, que se leuant
 de son siege avecques ceste ingenuité & modestie
 singuliere, tesmoigna à son pere & la reuerēce qu'il
 luy portoit pour lors, & l'obeissance qu'il luy ren-
 droit vne fois à ce commandement. Mais on doit
 bien s'asseurer, qu'il ne la receu plus de la bouche &
 du cueur du Pere, que de son naturel instinct, si bō
 & tenant si naïfement de ce Pere: lequel il a tant
 aimé & reueré, comme tous l'avez veu, & l'en avez
 vous mesmes souuētessois loué, luy promettant les
 benedictiōs que Dieu promet à ceulx qui se portēt
 de telle sorte enuers leurs pere & mere. Et mainte-
 nāt qu'il n'ha plus que Dieu pour pere, & q̄ sa bōté
 diuine luy garde vne mere si vertueuse, sage, & de-
 bōnaire Princeſſe, qu'est la Roynne: chacun de vous
 ſçait quel hōneur & quelle reuerence luy porte ce
 gētil & vertueux Prince, & de quelle amitiē il em-
 brassē Messieurs ses freres, Mesdames ses seurs, Ma-
 dame sa tâte, & tout ſō ſāg: & cōe il respecte tout ce
 qui touchoit au feu Roy son pere. Dōt il nous fault

tous bien esperer en sa bonté, par laquelle, & par le bon aduis & conseil qui est auprès de luy, il regira bien & sagement ce Royaume: sera à son peuple & à ses subiects bon Prince & gracieux: à les seruiteurs amiable Maistre: vray heritier, non seulement de la grandeur, mais de la vertu & bôté paternelle.

Doncques partant des prieres que nous faisons pour l'immortelle memoire du feu Roy, auquel nous pouuôs estre certains de ne faire plus agreable seruice, que de l'honorer & recognoistre, comme nous sommes tenus, en la personne du Roy Treschrestien son fils: nous ferôs semblable priere pour luy, que feit le Roy Dauid pour le Roy Salomon son fils, *Deus iudicium tuum Regi da, & iustitiam tuam filio Regis*, & ce qui s'ensuit, *Psal. 71.*

O Dieu qui es Roy souuerain & iuste iuge, mōstre à nostre Roy la maniere d'administrer tes iugemens: donne sapience au fils du feu Roy ton seruiteur, par laquelle il puisse entierement & droictement gouuerner ta iustice, que tu luy as commise: tellement qu'il iuge ton peuple que tu luy as baillé en charge, selon iustice, & tes pauures selon le droict, dont s'ensuyue vne bien grāde vnion, paix & concorde entre ses subiects: que les Princes & les Seigneurs communiquent en iustice auecques le peuple, lequel il maintienne en equité, preseruāt d'iniure & calomnie les enfans des pauures, & qu'il deprime le calomniateur. Faisant en ceste sorte, & ainsi gouuernant ton peuple, ô Roy tresheureux,
tu

tu seras crainct & redoubté, tant que ce soleil durera, tant que la lune sera, tât qu'il y aura generation d'hommes sur terre. Or de ces choses soit loué le Seigneur Dieu, Dieu des Israélites, Dieu auquel il n'y a point de semblable, qui fait seul de grandes merueilles, impossibles à tout aultre: soit aussi loué son nom glorieux à iamais, & que toute la terre recognoisse sa gloire, de laquelle elle est pleine:

& soit semblablement donné honneur

& gloire au Fils, & au saint Es-

prit, en tous les siècles des siècles.

Amen.



H.j.

Par lettres patentes du

Roy, donnees à Villierscofiterets le quatrieme iour de Septembre, mil cinq cens cinquante neuf, signees Par le Roy, mōsieur le Cardinal de Lorraine present, Robertet: & sceel-
 lees du grand sceel dudiēt Seigneur, en cire iaulne sur simple
 queue: Est permis à Robert Estienne marchand libraire &
 imprimeur demourant à Paris, d'imprimer & mettre en
 vente ce present liure intitulé, Les deux Sermons Fu-
 nebres es Obseques & enterrement du feu Roy
 Treschrestien Henri deuxieme de ce nom, faicts &
 prononcez par Messire Ierome de la Rouere, eslu
 Euesque de Tholon: l'un à Nostre Dame de Paris,
 l'autre à saint Denis en France. Et defenses à tous
 aultres libraires & imprimeurs quels qu'ils soyent en ce
 Royaume, de n'imprimer, faire imprimer, debiter, ne mettre
 en vête aultres que ceulx que lediēt Estienne aura imprimez
 ou faict imprimer, De deux ans prochains & accomplis, à
 compter du iour qu'ils auront esté paracheuez: Sur les
 peines plus amplement contenues audiēt Priuilege.